

Mid-Day Dogri News Bulletin, 15 August 2025

समा – 12:25 hrs.

<><><><><><>

PM Independence Day

अज्ज राष्ट्र 79मां स्वतंत्रता दिवस मना रदा ऐ। प्रधानमंत्री नरेन्द्र मोदी होरें स्वतंत्रता दिवस कार्यक्रम दी सदारत करदे होई ऐतिहासिक लाल किले च तिरंगा फहराया। प्रधानमंत्री नरेन्द्र मोदी होरें आक्खेया- “ए स्वतंत्रता दिवस उम्मीद ते जज्बे दा त्योहार ऐ।” उनें आक्खेया जे ए दिन इक सौ 40 भारतवासियें दे धेइये ते देश दी उपलब्धियें दा प्रतीक ऐ। मोदी होरें आक्खेया जे देश लगातार एकता दे जज्बे गी मजबूत करने च लग्गे दा ऐ। मोदी होरें आक्खेया- पिच्छले 75एं बरे आस्तै, भारत दा संविधान रस्ता दस्सने आली रोशनी दा कम्म करा रदा ऐ। देश डाक्टर श्यामा प्रसाद मुखर्जी उन्दी 125मीं पुण्यतीथि मना रदा ऐ, जिनें भारत दे संविधान आस्तै अपनी जिंदगी न्योछावर करी दिती ही। उनें आक्खेया जे “इक देश-इक कानून” दी सोच कन्नै उन्दी सरकार नै जम्मू-कश्मीर थमां धारा 370 हटाई दिती। उनें जोड़ेया जे देश पिच्छले केई दिनें च कुदरती आपदाएं, पस्सी पौने, बददल फटने ते दुई त्रासदियें दा शिकार होआ रदा ऐ। राज्य ते केन्द्र सरकारां इकट्ठे रलियै पूरी शक्ति कन्नै बचा अभियान, राहत कोशिशें ते पुर्नवास कम्में च लग्गी दियां न। लाल किले पुज्जने पर प्रधानमंत्री मोदी हुंदा स्वागत रक्षा मंत्री राजनाथ सिंह ते रक्षा राज्य मंत्री संजय सेठ होरें कीता। एदे मगरा प्रधानमंत्री होरें सलामी लैती । मोदी होर राजघाट गये ते राष्ट्रपिता महात्मा गांधी होरें गी श्रद्धांजलि दिती। प्रधानमंत्री मोदी होरें आक्खेया जे सरकार देश गी आत्मनिर्भर ते विकसित भारत बनाने आस्तै

कम्म करा रदी ऐ। विकसित भारत दी नीह आत्मनिर्भर भारत ऐ ते भारत हर क्षेत्र च नमापन ला रदा ऐ।

<><><><><><>

Independence Day Greeting

रक्षामंत्री राजनाथ सिंह होरें देशवासियें गी 79में स्वतंत्रता ध्याड़े दे मौके मुबारकबादव दिती ऐ। इक सोशल मीडिया पोस्ट च सिंह होरें आक्खेया जे ए ध्याड़ा छड़ा देश दी आजादी दा जश्न मनाने दा ध्याड़ा नैई ऐ, सगुआं देश गी आजाद कराने च बलिदान देने आलें सैकड़ां लोकें दी हिम्मत, दलेरी, देशभक्ति गी चेता करने दा पवित्र ध्याड़ा ऐ। उनें लोकें गी अपील कीती जे ओ इन्दे कोला प्रेरणा लैन ते सुरक्षित मजबूत ते खुशहाल विकसित भारत बनाने आस्तै रलियें कम्म करन। सूचना ते प्रसारण मंत्री अश्विनी वैष्णव होरें बी स्वतंत्रता दिवस पर सारें गी शुभकामनां दितियां न।

<><><><><><>

Kishtwar Cloudburst

जम्मू-कश्मीर दे पाडर उप प्रांत किश्तवाड़ दे दूर-दरेडे गां चशोती च वीरवारें बददल फटने करी 2 CISF कर्मियें ते मचेल माता यात्रुएं सनें 45 लोकें दे मरने दी खबर थोई ऐ। आकाशवाणी जम्मू संवाददाता नै जानकारी दिती ऐ जे अजें तोड़ी 120 थमां मते लोकें गी बचाई लैता गया ऐ। इन्दे चा 38एं दी हालत नाजुक ऐ। कैई लोक अजे बी लापता न। मरने आलें दी गिनतरी बदी सकदी ऐ। कीजे मलबे, मिट्टी हेठ किश लोक फसे दे न, ऐसा मनेया जा रदा ऐ। बड़े

पैमाने पर बचाव अभियान चलाया जा रहा है, जेदे च SDRF, पुलिस, सेना ते मकामी स्वयंसेवी अपनी सेवां देया रहे न। ए आपदा मचेल माता यात्रा दे पड़ा चशोती च होई, जित्थे तोड़ी यात्रा गड़ियें च पुजदे न, कल दपैहरी 12 बजिये 25 मिन्टे पर इस कुदरती कहर नै अपना रंग दस्सेया। किश रिहायशी मकान, 6 सरकारी ईमारतां, 3 मंदिर, 4 घराट, 2 अस्तबल ते इक निक्का पुल इस त्रासदी च रुड़ी गे। बिजली दे खम्बे पटोने कन्नै बिजली आपूर्ति च खलल पेया ऐ।

<><><><><><>

CM Omar Abdullah

उपमुख्यमंत्री उमर अब्दुल्ला होरें स्वतंत्रता दिवस दे मौके श्रीनगर दे बक्शी स्टेडियम च आयोजित मुख्य कार्यक्रम दी झंडा चाढ़िये सदारत कीती। उनें जम्मू-कश्मीर पुलिस, केन्द्र सशस्त्र, अर्धसैनिक बलें ते स्कूली बच्चें दी मार्च-पास्ट दी सलामी लैती। मुख्यमंत्री उन्दे कन्नै दुए काबिना मंत्री बी इस कार्यक्रम च मौजूद हे। कल किशतवाड़ दे चशोती ग्रां च बददल फटने करी मारे गेदे लोकें दे सम्मान च मुख्यमंत्री होरें सांस्कृतिक कार्यक्रमें गी रद्द करी दिता हा।

<><><><><><>

Poonch Independence Day

बन्ने कन्नै लग्गदे पुंछ जिले च 79मां गणतंत्र दिवस पूरे जोश-जज्बे कन्नै मनाया गया। जल-शक्ति मंत्री जावेद अहमद राणा होरें परेड दी सलामी लैती, जिसी जम्मू-कश्मीर पुलिस, JKAP, NCC, 93 Infantry दे बैंड QRT कमांडों दे स्कूलें दे बच्चें प्रस्तुत किता। लोकें गी अज्जै दे ध्याड़े

दी मुबारकबाद दिंदे होई राणा होरें महान स्वतंत्रता सेनानी-महात्मा गांधी, पंडित जवाहर लाल नेहरू, भगत सिंह, सुभाष चन्द्र बोस होरें गी चेता किता, जिनें देश दी आजादी लेई बलिदान दिते। उनें आक्खेया जे आजादी मगरा नेताएं दी बेहतरिन नीतियें करी भारत नै दुनियां च उभरदी होई अर्थव्यवस्था बनने दा दर्जा प्राप्त कीता।

<><><><><><>

Div.Com Jammu

जम्मू दे डिविजनल कमीशनर रमेश कुमार होरें कल अभिनव थियेटर जम्मू च विभाजन विभिषिका स्मृति दिवस पर इक प्रदर्शनी दा उदघाटन कीता। इस प्रदर्शनी च 1947 च देश दी बंड दौरान लोकें उप्पर होए दे जुल्मोसितम गी दर्शाया गेदा ऐ। उदघाटन मगरा कलाकारें, लेखकें ते बुद्धिजिवियें इक स्मृति कार्यक्रम च हिस्सा लैता जिस दौरान के.एल सैहगल हाल च, बंड दी त्रासदियें पर इक डाक्यूमेंट्री जारी कीती गई। डिविजनल कमीशनर होरें आक्खेया जे देश दी बंड दौरान होए दे जुल्में गी देश भुलाई नेंई सकेया ऐ। उनें दसेया जे POJK ते पश्चमी पाकिस्तान थमां आए दे विस्थापित ते शरणार्थी सब्भनें थमां पीड़ित होए न ते सरकार उन्दे दुख दर्द दूर करने लेई सब्भै जतन करा रदी ऐ।

<><><><><><>

Har Ghar Tiranga

राजोरी जिले च “हर घर तिरंगा अभियान” च 17 हजार शा मते नागरिकें, दंडू तिरंगा रैलियें च शिरकत कीती। नौशेहरा च हर तिरंगा अभियान तैहत 2 किलोमीटर लम्मा मार्च कड्डेया

गेया, जेदे च 10 हजार शा मते नागरिकें हत्थे च तिरंगे लेइयें हिस्सा लैता।राजौरी कस्बे च कड्डी गेदी तिरंगा रैली च 7 हजार लोकें हिस्सा लैता ते DIG तेजिन्द्र सिंह, डिप्टी कमीशनर अभिषेक शर्मा ते SSP गौरव सिकरवार होरें रैली दी अध्यक्षता कीती। रैली TRC थमां शुरु होइयें धनीधार किले च जाइयें सम्पन्न होई। नियंत्रण रेखा कन्नै लग्गने आले राजौरी जिले च हर घर तिरंगा अभियान च लोक बडे उत्साह कन्नै शामिल होआ रदे न।

<><><><><><>